


御纂周易述義

御纂周易述義卷之三



艮下
兌上

咸亨利貞取女吉

山澤通氣上下相感曰咸天地之間感應而已天
以氣感無心而通人以神感不言而喻故咸未有
不亨者而但患其不貞如君臣以邪僻朋友以諂
佞男女以淫姣則不貞而因以不亨矣以性相通
不以情私斯冥漠之訢合皆天理之流行也卦以

二少相感男下乎女婚姻之正也故用以取女則
吉貴其貞也夫婦者人倫之始婚姻之禮正然後
品物遂而天命全故詩始關雎禮重大婚易之下
經首咸恆以配乾坤皆是道也

初六咸其拇

感通之幾莫捷於心身聖人通天下爲一身知所
以感身則知所以感天地萬物矣故六爻皆以身
取象也拇足大指初在下故象拇人心欲有所往

身未動而拇先伸是動之微幾之先見者也人不
知而已獨知之謹之則吉不謹則凶故不言占教
謹幾也

六二咸其腓凶居吉

腓脛肉也二在股足之間故爲腓腓不自動因足
而動且不能自止也動而不能止凶道也然不能
止腓當止其足去躁去妄常使居而不行則腓無
由動亦因之以得吉矣意外之擾皆自取之宜杜

周易正義 卷之三
其原也故君子慎動

九三咸其股執其隨往吝

三在腓上互巽爲股隨指下二陰而言足之拇腓乃隨股者初二者三之隨也此卦有拇腓動而股亦因而動之象是爲陰柔所係執於其隨矣非感之正也故爲往而羞吝蓋下三爻皆用靜吉也九四貞吉悔亡憧憧往來朋從爾思

四當心位不言咸其心者感乃心也然有心爲感

感卽累心有所私係則悔生焉故咸利於貞貞者
無心之謂也冲然而虛凝然而止無心於感而無
所不通故吉無所不通其悔皆亡也若逐物於外
往而感物往極而來仍執其私是憧憧於往來之
際則心之體失而思起矣其類從而擾之則其感
適足以爲心害也故曰主一之謂敬無適之謂一
主於一則貞矣有所適是往來也此內外賓主之
辨也

九五咸其脢无悔

脢脊肉也前與心對一身皆動惟脢不動是不能
感物而物亦不感者也五在四上近於兌口一有
所感則駟不及舌悔無及矣剛而得中戒其外馳
而務止於內故咸其脢感於所不感也是有心於
絕感也夫有心於感與有心於不感皆非貞也然
有心於感則必有悔若有心於不感則止於靜而
可以无悔所謂艮其背者其庶幾乎亦事心之一

道也

上六咸其輔頰舌

上當兌口輔在口旁頰在輔下舌在口中咸其輔
頰舌以言感人也以心感人尚恐有悔心不相通
而徒以言感則更淺矣謹之猶可不謹必凶故不
言占教謹言也咸主於動其道尚靜拇動謹幾舌
動謹言腓欲其居股欲其處皆尚靜也然必如五
之咸脢則又偏於靜而不能動矣靜非守寂惟止

於貞貞者純乎理而無欲也理實則心虛心虛則
能受能受則能感感而仍虛則無偏動偏靜之咎
矣此九四之貞所以獨得吉也是故知貞之爲虛
者可與言心之體矣知虛之爲感者可與言心之
用矣



恆亨无咎利貞利有攸往

開闢之機始於風雷隨時遞變而萬古不息故曰

恆人心之德亦必始終如一事乃可成故貴恆書
曰德惟一動罔不吉是也然非執一而不變也必
因事制宜乃亨而無執一之咎矣書曰德無常師
主善爲師是也然變非意爲之也有不易之理焉
必隨時處中變而不失其正故利於貞書曰善無
常主協於克一是也此必本於遜志時敏日進不
已故又利有攸往書曰始終惟一時乃日新是也
恆之爲義大矣哉

初六浚恆貞凶无攸利

浚深也初六巽主其性善入故以浚爲恆強求深也庸德庸言事近而理平強求其深雖正亦凶爲其用智而失之鑿求道而索之隱也以之修己則銳進者易退以之爲政則欲速者不達无攸利焉深戒受也

九二悔亡

以九居二剛而不正有悔者也以其得中所應又

中時位不當而能素位以求中隨時以處中則不正之悔皆亡矣彖之亨貞利往皆有之焉故不言象而止言占也

九三不恆其德或承之羞貞吝

九三剛正乃其德也以其過中又巽之究爲躁卦故不能恆其德焉五爻皆恆而已獨不然所遇之人皆羞辱之不知其所從來也雖貞亦吝惜之也二不正以能恆而悔亡三雖正以不恆而貞吝君

子是以知恆之爲貴也

九四田无禽

震馬動田象也又爲大塗无禽之處也四在震初
不中也以陽居陰不正也不中不正動而不已是
恆於所不當恆者如田於无禽之地雖久而終無
得也楊墨之仁義黃老之道德申韓之治術記誦
詞章之學問皆是也三有德而不恆四能恆而無
德君子是以知恆之利貞也

六五恆其德貞婦人吉夫子凶

六五柔中是其德也應二剛中是恆其德也有其德而能恆是恆之貞也然以柔從剛恆而不變是婦人之貞而非夫子之義也五震男而互兌女以爻則二陽而五陰陰恆從陽乃婦人之吉也以卦則上震而下巽男恆從女則夫子之凶也四誤用其剛故恆而不貞五過用其柔故貞而不亨猶有咎焉君子是以知恆之爲道非執一也

上六振恆凶

變動曰振上居震極柔不能守而變動不已是以振爲恆變而不得其正也五守貞而不亨猶得半而失半上求亨而不貞則無之而可矣故凶也乃知恆之爲道中而已矣四无禽而初浚不及中也泥常而不知變也三不恆而上振已過中也好變而失其常也二五中矣五柔不變未能制義惟二剛中隨時變易以從道斯亨貞兩得之矣不變所

以守中能變所以時中變不變之迹異而其中同也書曰惟精惟一允執厥中此之謂也



艮下
乾上

遯亨小利貞

陰內而長陽外而消其勢不勝故遯陽避陰也遯有身遯亦有心遯不當位者見機而作以身遯也當位者不惡而嚴以心遯也身遯則君子猶能伸其道心遯則小人不能售其奸故遯而亨時當然

周易近事 卷之三
也小謂陰也陽雖從時陰不可以恃勢故利於貞
貞者順以從陽不害君子也不害君子則君子得
以維世小人亦與有利焉能知貞之爲利而小人
亦可以化矣

初六遯尾厲勿用有攸往

卦以上爲首初爲尾初與四應四遯於前初尾其
後是小人隨君子而伺之君子危而小人亦厲故
教以勿往不尾也不尾則兩無事矣此小貞之一